

Edizione diplomatico-interpretativa

	I
De bone amour uient sci- ence et biautez. et a- mours uient de ces deus autresi. Li troi sunt un qui bien i a pense. iamaiz nul iour nen seront depar - ti. par un conseil sunt ensamble e- stabi. li coureur qui deuant sunt ale. de mon cuer ont fait lor che- min ferre. tant lont use. ia nen se- ront parti.	De bone amour vient science et biautez, et amours vient de ces deus autresi. Li troi sunt un qui bien i a pensé; ia maiz nul jour n'en seront departi. Par un conseil sunt ensamble estabi li coureur qui devant sunt alé: de mon cuer ont fait lor chemin ferré; tant l'ont usé ja n'en seront parti.
	II
Li coureur sunt la nuit en clarte. et le iour sunt pour la gent oscurci. li douz reguart plaisant et sauoure. la granz biautez. et li biens que gi vi. ne men merueill. se ie men esbahi. de li adieux le siecle enlumine. quar qui uerroit le pluz biau iour destre. uers li seroit obscurs en plain midi.	Li coureur sunt la nuit en clarté et le jour sunt pour la gent oscurci: li douz reguart plaisant et savouré, la granz biautez et li biens que g'i vi; ne m'en merveill se ie m'en esbahi. De li a Diex le siecle enluminé, quar qui verroit le pluz biau jour d'esté, vers li seroit obscurs en plain midi.
	III
En amour a paour et hardement. li dui sunt troi. et du tiers sunt li dui. et granz ualours est aciauz a- pendanz. u amours a et recoi. et re- fui. pour ce est amours li hospitaux dautrui. que nus ni faut selonc son auenant. et iai failli dame qui ualez tant. a vostre hostel. si ne sai qui ie sui.	En amour a paour et hardement: li dui sunt troi et du tiers sunt li dui, et granz valours est a ciauz apendanz, u amours a et reçois et refui. Pour ce est amours li hospitaux d'autrui que nus n'i faut selonc son avenant. Et i'ai failli, dame, qui valez tant, a vostre hostel, si ne sai qui je sui.
	IV

Or ni a plus. fors qua li me con- mant. quar touz biens fais ai lais- siez pour cestui. ma bele uie. u ma mort i atent. ne sai le quel. maiz quant deuant li fui. ne me firent si uair oeill point danui. il mont naure parmi le cuer dedenz. dun douz re- guart. si amourusement. encore i est li colpz que ien recui.	Or n'i a plus fors qu'a li me conmant, quar touz biens fais ai laissez pour cestui: ma bele vie u ma mort i atent, ne sai le quel maiz quant devant li fui. Ne me firent si vair oeill point d'anui, il m'ont navre parmi le cuer dedenz d'un douz reguart si amourusement, encore i est li colpz que i'en reçui.
	V
Li colpz fu granz. il ne fait quem- pirier. ne nuls mires ne le porroit sa- ner. se cele non qui le dart fist lancier. se de sa main i deignoit adesper. tost en porroit le coup mortel oster. atout le fust. dont iai grant desirrier. maiz la pointe du fer nen puet sachier. que- le brisa dedenz au coup douner.	Li colpz fu granz il ne fait qu'empirier, ne nuls mires ne le porroit saner se cele non qui le dart fist lancier. Se de sa main i deignoit adesper, tost en porroit le coup mortel oster a tout le fust, dont i'ai grant desirrier; maiz la pointe du fer n'en puet sachier, qu'ele brisa dedenz au coup douner.

- letto 1660 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizione-interpretativa-64>